

欽定臺規

十九

欽定臺規卷二十九

稽察一

京通十六倉

順治二年都察院題准差御史一員巡視京通各倉○七年戶部題准停止巡倉差○八年都察院題准京通倉差不便裁去應復差御史巡視○十年題准巡倉差照巡鹽例一年一次更替○康熙七年都察院題准管理京通各倉有侍郎二員管勘收進等事有戶部專差滿漢郎

中員外郎等官巡倉御史並未另有專管之責。相應裁去。○二十年戶部題准倉糧關繫緊要應差滿漢御史各一員稽察。○又都察院題准題差巡倉舊例出過兩差差過兩浙兩淮巡鹽一次者並掌河南道京畿道事御史不行開列查巡倉差屬緊要其差過兩浙兩淮巡鹽及掌河南道京畿道御史應一體開列。○二十六年吏部等衙門會覆倉場侍郎巡倉御史所理俱係一事並未另有料理應行之處應將巡倉滿

漢御史俱行裁去。○雍正二年奉

旨特設巡察御史一員。總查倉場弊端。○又議准每年到通船六千餘隻。所收茶果銀兩。動支數目。以及買過餘米。應令坐糧廳俟糧務完竣日。按所到船隻逐一分晰造冊具題。儻此外另有需索之處。倉場侍郎。巡倉御史訪拏題參治罪。○三年奉

上諭。今年天津等處地方被水。米價甚是騰貴。去歲盛京會由海運糧十萬石。著行文將軍。府尹等。將伊等

地方糧十萬石由海運至天津新倉俟到日交與地方官收貯將盛京等處倉內收貯舊米每年糶賣易進新米所出舊米若足十萬石卽行運送儻不足十萬石著酌量賤價買足十萬石之數運送再若有自海運糧之商人不必禁止聽其運至天津貿易不許他往著給事中增壽前往再著都察院派漢御史一員○五年奉

上諭倉場米石乃國家第一要務關繫最爲重大試思此項米石民間輸納何等辛苦官員徵解何等煩勞

且糧艘運送京師何等繁難。一顆一粒皆當愛惜。不忍輕忽。朕爲此一事。宵旰焦勞。時時切加訓飭。至再至三。且曾降旨。令修理倉廩等項。不惜多費帑金。務期完固。若不嚴行稽察。無以儆怠忽。而清弊端。在京十倉。每倉或都統。或副都統。各派一員。御史不論滿漢。每倉各派一員。專任稽察之責。其米石出入支放。奏銷事件。不必經管。仍屬倉場侍郎管理。其房屋滲漏。牆垣損壞。與倉內鋪墊。及匪類偷竊。一切情弊。俱交與派出之都統。副都統。御史稽察。遇有查出之處。

卽行知會倉場侍郎。若倉場侍郎不及辦理妥協。敢致遲延。著派出之都統。副都統。御史奏聞。儻有應行查出之處。不行查出。將缺少米石。應賠之項。著落倉場監督等官。與派出之都統。副都統。御史分賠。其通州三倉。卽照此例。交與通永道。通州副將稽察。其失察分賠之處。亦照依京倉施行。○七年奉

上諭。向來各倉米石。蓋藏不謹。每每攙和灰土。純雜不一。是以領米之時。勾通賄囑。使費繁多。弊端種種。數年以來。嚴飭該管等官。慎守倉儲。屏除陋弊。米色旣

已勻淨。則在倉執役之人及赴倉領米之人均當懍
遵法紀。不應仍存作弊之心。復蹈故轍。著八旗都統
等通行傳諭該旗。並令倉場侍郎出示曉諭。若本人
赴倉領米之時。其所得之米果有攙和灰土等弊。令
其當時在倉將不淨之米交與該監督封貯。或到倉
場侍郎處。或到巡倉御史處據實呈明。卽行查究。儻
有希圖作弊。以及倉場人役等暗中勾通賄囑者。一
經發覺。將與受之人一同從重治罪。決不姑貸。○十

二年奉

上諭前因倉場米石關繫緊要在京十倉每倉或都統或副都統各派一員御史各派一員分任稽察之責於倉場不無裨益但從前未定更替之期現在各員中有歷至三四年尚未更換者朕思日久因循易生懈怠且或偶有疎虞該員慮干失察因而掩飾彌縫亦未可定著定爲三年更代屆期各倉一同更換若有接任之員未滿三年卽屆更換之期者亦一體更換○又議准京中各倉每年戶部各撥銀百兩交貯倉場侍郎衙門凡有一應奇零修葺之處令

該倉監督確估申報倉場侍郎並稽察之都統御史察看領銀及時修補至工程在百兩以上者應令稽察之都統御史會同倉場侍郎察看確估具奏興修○乾隆十年議准稽察倉場侍郎都統等若有出差患病服制等事在二三月以內者行文都察院交與稽察之御史專行巡察有應辦者卽行辦理○十三年奉

上諭令都統御史查倉並非祇令稽察倉廩滲漏原令其兼查盜米等弊今查倉大臣官員以非關己任不

行察看實非差往本意著查倉都統御史等凡有偷領私米等弊嚴加稽察毋得疏慢○十七年奏准京通各倉每倉奏派御史或給事中一人不論滿漢專司稽察年終更代將一年內並無短收多放攙越廩座之處據實奏明交戶部存案○又奏准各倉整廩向係倉場侍郎封識其放剩零米廩座倉監督自行封閉嗣後零廩俱由查倉都統御史封識放米時驗封啟鑰○又奏准稽察京倉之都統御史除八旗該班及五城理訟

日期外輪流到倉儻都統

內廷侍直則御史亦應獨任如有疏略亦卽查叅。
○十八年議准各倉鑰匙向例監督收存嗣經
議令倉場侍郎收執至點廩放米始行發倉但
恐值大雨時行不能及時查看嗣後新漕進倉
每年四五六七八月間將鑰匙暫給監督收執
一遇大雨通倉呈請倉場侍郎京倉呈請都統
御史卽行開封查驗修補○又議准修理京倉
銀數在百兩以上者查倉都統移咨工部查估

咨覆該都統奏明興修工竣仍由工部查銷修理通倉卽令查倉御史倉場侍郎造冊會題由工部覆議興修○二十五年議准各倉整廩例應倉場侍郎封識但倉場遠駐通州在京各倉勢難隨時查驗嗣後應一併責令都統御史等查驗貼封○又奏准歲修倉廩務於春三月勘估動工玩視者查叅若監督已報而都統御史不卽查辦一併議處○二十八年奉

上諭派出查倉之都統御史等嗣後放米日期務須親

身前往巡察卽有別差二人內必著一人前往○二十九年議准嗣後各倉放完米石之時著該旗派出監放之參領等將用過錢數當時出具畫押保結送查倉御史覈對凡遇開倉之日都察院揀選五城幹捕撥給查倉御史聽候差遣○三十年議准修理倉廩銀數在百兩以上者由工部查估送查倉大臣具奏辦理外其銀數在四百兩以上者由工部知會內務府派員同修在四百兩以下者由工部專員修理本倉監督

隨工查驗。仍令查倉大臣不時稽察。工竣後。查倉御史查收。將承修官職名及修理年月銀數。造冊存貯。再遇興修。敘明入奏。○三十三年。議准京通各倉。一年所收米石。全數放竣。倉場侍郎會同查倉都統。御史將原貯放過贏餘各數。逐廠詳查確數。造冊具題。戶部覈對題覆。○三十五年。奉

旨。戶部議覆。御史郎圖條奏。支放兵米一摺。各旗赴倉支放甲米。僅派押旗參領。不足以資約束。統計每旗

滿洲蒙古漢軍都統副都統共有九人何難輪派一員前往查察如有兵丁花戶舞弊情事即可隨時辦理况各處有原派查倉都統既令查辦倉廩事務其放米時有無情弊亦應一體責令彈壓實力稽察以專責成嗣後俱照此旨行○三十七年議准安河橋豐益倉照本裕倉之例改歸倉場管理添派都統御史各一員稽察○四十年奏准查倉科道有奉

旨派出巡城者其所查倉務若距更換之期不遠即

派員暫署。儻爲期尙久。揀員奏派。○四十三年。奏准戶部所屬內倉。向無稽察人員。嗣後於內外各倉。更換科道時。添派一員稽察內倉。年滿一體更換。○又議准查倉科道。有與該監督同旗同省。以及外姻內親者。照例迴避。如查倉之科道。到任在先。例應迴避之。該倉監督到任在後。該科道卽咨明倉場侍郎。與別倉監督調換。○四十四年。議准各倉開放土米時。務令各城司坊官親身赴倉支領。並令查倉都統御史前